
Title	Perayaan Hari Raya
Author(s)	Muhammad Ariff bin Ahmad

Copyright © 1982 Muhammad Ariff bin Ahmad

2 Julai 1982

Haji Muhammad Ariff Ahmad
Dwibahasa ST

PERAYAAN HARI RAYA

Hari Raya Puasa yang biasa juga disebut sebagai "Aidilfitri" atau "Aidil-Mubarak" bagi tahun hijrah 1402 akan kita rayakan tidak lama lagi. Kad-kad Ucap Selamat Hari Raya sedang diedarkan kepada keluarga dan sahabat handai yang berjauhan; lagu-lagu Selamat Hari Raya menerusi radio sedang berkumandang seluas-luasnya.

Selain daripada merupakan satu perayaan agama, Hari Raya Puasa ini adalah satu pengalaman kebudayaan di mana beberapa kebiasaan tradisi/varisan dan beberapa kepandaian seni digiatkan secara serentak. Setengah-setengah kegiatan merayakan Hari Raya itu termasuk kebiasaan-kebiasaan kebudayaan yang selaras dengan ajaran Islam, dan yang setengah-setengahnya pula ialah kebiasaan-kebiasaan kebudayaan yang tidak bertentangan dengan ajaran Islam.

Oleh kerana biasanya, orang-orang Melayu merayakan Hari Raya ini secara besar-besaran dan menyeluruh; mengatasi perayaan-perayaan kebudayaan dan agama yang lain-lain, seperti majlis perelatan nikah kahwin, majlis perayaan Maulidin-Nabi dan yang sebagainya, maka kedatangan ramai rakan-rakan bukan-Melayu kita yang menyangka bahawa Hari Raya Puasa ini adalah "tahun baru" bagi orang-orang Melayu.

Itulah sebabnya barangkali, masih ada rakan-rakan bukan-Melayu kita yang mengucapkan Selamat Tahun Baru kepada rakan-rakan Melayunya ketika mereka menziarahi rakan-rakannya pada Hari Raya itu. Rakan-rakan bukan-Melayu itu perlulah diberitahu bahawa Hari Raya ini bukan tahun baru. Hari Raya Puasa itu jatuh pada seharibulan Syawal, iaitu bulan kesepuluh dalam tahun-tahun Hijrah; masih ada dua bulan lagi umur tahun Hijrah itu sebelum menjelang tahun barunya pada seharibulan Muharram.

Seharibulan Muharram bukan "public-holiday" di Singapura. Hari itu tidak dirayakan besar-besaran di sini, berbanding dengan perayaan Hari Raya Puasa itu. Yang demikian bukanlah salah mereka kalau mereka menganggap Hari Raya Puasa itu sebagai tahun baru. Bagaimanapun, ada baiknya kalau dapat kita betuli kesilapanggapan itu.

more...

Islam mewajibkan penganut-penganutnya supaya mengeluarkan zakat fitrahnya pada malam Hari Raya; atau selewat-lewatnya pada pagi Hari Raya itu sebelum orang mendirikan salat Aidilfitri. Di Singapura, Majlis Ugama Islam (MUIS) telah menguruskan pengumpulan zakat fitrah itu bagi pihak lapan asnaf manusia yang berhak menerima fitrah itu. MUIS telah menggalakkan supaya umat Islam Singapura mengeluarkan zakat fitrahnya lebih awal, iaitu mulai dari 10 Ramadhan - masing-masing ada masa 20 hari untuk mengeluarkan zakat fitrahnya sebelum menjelang malam Hari Raya itu.

Kebudayaan pula menganjurkan masyarakat kita supaya membuat persembaan dan mengaturkan perayaan Hari Raya itu sebaik-baiknya dan dalam suasana penuh kemeriahan. Bagaimanapun, kedua-dua ajaran "agama" dan "kebudayaan" itu, sama-sama menentang pembaziran.

Ungkapan "sebaik-baiknya" itu ditafsirkan oleh Islam menerusi sabda Rasulullah "khairil umuri ausatuh" (maksudnya: sebaik-baik perbuatan ialah yang pertengahan - sederhana) manakala kebudayaan pula membataskan "sebaik-baiknya" itu menerusi peribahasanya "buat baik berpada-pada; buat jahat jangan sekali".